

本草彙言

本草彙言卷之八

錢塘 倪朱謨純字甫選集 男倪洙龍沖之氏藏稿

沈公岐則施甫校正

木部 香木類

桂味甘辛氣熱臭香有毒陽中之陽浮也入手太陽太陰

足太陽太陰少陰經

李薊湖曰桂有四等曰牡桂菌桂桂心桂枝之分同是
一種壯桂出合浦交趾廣州象州湘州桂嶺諸處生必
高山之巔旁無雜樹自為林類葉色四時皆青凌冬不
凋如枇杷葉邊有鋸齒中心有縱文兩道宛如圭形四
月放花無實木皮紫赤堅厚臭香氣烈味重者為最枝
皮為桂枝幹皮之薄者為桂皮厚者為肉桂為桂心○
又菌桂出交趾桂林山谷生必臨崖正剛如竹小于牡
桂亦自為林凌冬不凋葉如柿葉尖狹光澤邊無鋸齒
中心有縱文三道三月結莖黃色四月放花五月結子
如閩河之實木皮青黃骨軟而嫩易于環卷如筒亦以

皮之厚薄分桂心桂枝之差等也。○桂海志云：凡諸木類葉中心皆一道縱理，獨桂葉有兩道三道。如圭形，故字從圭。又埤雅云：桂，猶圭也。宣道百藥為之先，聘通使如執圭之使也。古名榘，言能侵害他木，故炮炙論云：以桂木削釘釘樹根，其樹即死是也。○蘇氏曰：本草載桂，只有牡桂、簡桂二種。今嶺表所出，則有筒桂、肉桂、桂心、官桂、板桂之名，而醫家用之，罕有分別。筒桂，正圓如竹，有二三重者，則今之茵桂是也。官桂，皮薄色黃，肉薄脂少，即今之牡桂是也。若平卷多脂，即今之板桂是也。若肉桂，桂心皆從筒桂中分，其肉厚，其臭香，其味辛甘，其色紫者，即肉桂也。若肉桂又去外層，留其中心一層者，即桂心也。如此分別，則桂之名義可得而知矣。又丹陽山有一種山桂，葉如麻，四月開細黃花，木色亦紫，氣微香，只是味苦辛，與肉桂之香甘辛迥不同也。市中有偽充肉桂，不可不辨。

○桂枝散風寒，逐表邪，發邪汗，止咳嗽，去肢節間風痛之

藥也。字韻云：枝，指也。從木，榦而分支，致四末也。氣味雖

不離乎辛熱，但體屬枝條，僅可發散皮毛肌腠之間遊

行臂膝肢節之處故能散風寒逐表邪自內出外辛以散之甘以和之熱以行之又能入血分利肝肺氣止煩止咳兼除風痺肢節攣痛專取其氣薄輕揚上浮達表出汗而通腠理也仲景書用以治冬月傷風寒卽病邪在表者寇成兩氏論之詳矣

○牡桂治癰疽排潰瘍化膿血止疼痛利筋骨血脈之藥也說韻云牡陽象也有花無子較枝稍強也故能行皮腠血肉之內治癰疽已潰未潰護心托裏或筋骨痠疼肌肉頑痲或惡露不行上攻心嘔或跌撲損傷瘀血積滯藉此辛甘溫熱之用善行血脈以通筋骨去陳以致新也

○肉去陰寒止腹痛通經脉化冷痰散奔豚定寒疝固

泄注虛汗注暖腰膝安蛔逆注治沉寒痼冷之藥也此獨

得純陽注之力以行辛散甘和熱火之勢乃大溫中

之劑凡元虛不足而亡陽厥逆或心腹腰痛而吐嘔泄

瀉或心腎久虛而痼冷怯寒或奔豚寒疝而攻沖欲死

或胃寒蛔出而心膈滿脹或血氣冷凝而經脉阻遏假

此味厚甘辛大熱下行走裏之物壯命門之陽植心腎

之氣宣導百藥無所畏避使陽長則陰自消而前諸證

自退矣如大氏方又謂消痰血破瘀癖者亦取其辛烈

陽健之氣橫行直往瘀血得熱則行而瘀癖僻居腸胃

膜絡之間自不容于不行矣

繆仲淳先生曰。桂其味辛甘。其氣熱烈。其性橫行直走。獨熱偏陽。表裏俱達。如和營衛。散表邪。出汗。實腠理。則桂枝爲長。故仲景專用。以治冬月傷風寒。卽病邪在表者矣。更有桂心。與肉桂實一物也。祇去皮耳。此則走裏行營。除寒破血。平肝入右腎命門。補相火不足。其功能也。然大忌于血崩。血淋。尿血。陰虛吐血。咯血。鼻衄。齒衄。汗血。小便因熱不利。大便因熱燥結。肺熱咳嗽。或產後去血過多。及產後血虛發熱。小產後血虛內熱。陰虛五心煩熱。陰虛小腹作疼。血熱經行先期。血虛內熱。經閉。陰虛寒熱往來。血虛經行作痛。男婦陰虛內熱外寒。口苦舌燥。或中暑昏暈。中熱腹痛。中暑瀉利暴注如湯。或

一切滯下純血。由于內藏伏熱。或腸風下血。藏毒便血。酒後失血。或陽厥似陰。夢遺精滑。虛陽數舉。脫陰目盲。或一切溫病熱病。頭疼口渴。陽證發狂。陽毒發斑。或小兒痧疹。腹疼作瀉。痘瘡血熱。乾枯黑陷等。三十餘證。法並忌之。誤投則禍不旋踵。僅察病因用舍。在斷行其所明。無行所疑。其難其慎。毋嘗試也。

前賢寇氏曰。桂辛甘大熱。素問云。辛甘發散爲陽。故仲景氏用桂枝湯治傷寒表虛。皆需此藥。正合辛甘發散之意。本草三種之桂。不用茵桂。牡桂者。此二種性止于溫。不可以治風寒之病也。然農皇氏止言桂。仲景氏又分桂枝者。特取枝上皮也。王氏曰。或問本草言桂能止

煩出汗而張仲景治傷寒有當發汗凡數處皆用桂枝湯又云無汗不得用桂枝汗家不得重發汗若用朴枝是重發其汗汗多者用桂枝甘草湯此又用桂枝閉汗也一藥二用與本草之義相通否乎曰本草言桂辛甘大熱能宣導百藥通血脈止煩出汗是調其血而汗自出也仲景云太陽中風陰弱者汗自出衛實營虛故發熱汗出又云太陽病發熱汗出者此爲營弱衛強陰虛陽必奏之故皆用桂枝發其汗此乃調其營氣則衛氣自和風邪無所容遂自汗出而解非桂枝真能開腠理發出其汗也汗多用桂枝者以之調和營衛則邪從汗出而汗自止非桂枝能閉汗孔也昧者不知出汗閉汗

之意。一遇傷寒無汗者。卽用桂枝。誤之甚矣。言桂枝發汗。發字當認作出字。風散營衛和。則汗自然出。非若麻黃大開腠理。發泄其汗也。其治虛汗亦當逆察其意。可也。成氏曰。桂枝本爲解肌者。太陽中風。腠理緻密。營衛邪實。津液凝固。其脉浮緊。發熱汗不出者。不可與此。必也。皮膚疎泄。自汗出。脉浮緩。風邪于衛氣者。乃可投之。發散以辛甘爲主。桂枝辛熱。故以爲君。而以白芍藥爲臣。甘草爲佐者。風淫所勝。平以辛苦。以甘緩之。以酸收之也。以薑棗爲使者。辛甘能發散。而又用其行脾胃之津液。而和營衛。不專于發散也。故麻黃湯不用薑棗。專于發汗。不待行其津液而汗也。

○集方治傷寒太陽病頭痛發熱汗出惡風者用桂枝白

芍藥生薑各二兩甘草一兩大棗十二枚水五升微火

煎至二升徐徐服○治傷風冷咳嗽用桂枝五錢防風

半夏各三錢乾薑一錢北五味子北細辛各五分水煎

服○治四肢骨節間風痛用桂枝當歸白朮防風羌活

各二錢葛黃秦朮紅花川芎黃柏甘草各一錢水煎服

○集方治癰疽發背膿水清稀膿毒不化疼痛不止用牡

桂五錢白芷黃耆當歸皂角刺穿山甲人參各三錢羌

活乳香沒藥金銀花各二錢水酒各半煎服○治產後

惡露不行上攻心嘔用牡桂五錢玄胡索醋炒五靈脂

當歸紅花陳皮各二錢水煎服○治跌撲損傷瘀血積

滯脹悶疼痛用牡桂三錢當歸川芎紅花蘇木桃仁乳香沒藥牛膝各二錢水煎服。

○集方治三陰直中寒證頭不疼身不熱口不渴或有微熱微渴自汗腹痛泄瀉吐冷涎吐蛔蟲四肢厥冷躁煩

不寐或語言錯雜時昏時省用肉桂附子童便製人參各三錢乾薑白朮炒黃耆吳茱萸各五錢北細辛一錢

五分水煎服○治三陰寒疝攻沖欲死亦有厥逆自汗者用肉桂附子童便製小茴香青皮楸核厚樸陳皮吳

茱萸各三錢水煎服○治奔豚疝瘕沖築用肉桂乾薑小茴香各五錢牡丹皮木香檳榔各二錢甘草五分水

煎服○治婦人經脉冷凝阻遏不通腹痛脹悶用肉桂

木香各三錢。陳皮、玄胡索、香附俱醋炒。當歸、川芎俱酒炒。牡丹皮、桃仁、烏藥各二錢。水煎服。○治積年_{五方}痲痺，不消時發時止。用肉桂、木香、白木各一兩五錢。當歸、枳川芎、香附、小茴香俱酒炒。佛手柑、茯苓各三兩。澤瀉、山藥各二兩。俱炒過。研爲末。煉蜜丸。梧子大。每早服五錢。白湯下。○治胎死不下_{何山方}。用肉桂心研細末二錢。芒硝一錢。熱酒調服。立下。如難產及橫生者。本方去芒硝。加麝香二分。溫酒調下。○治大人_{珠心}小兒_味及老邁人食水菓乾菓等物傷脾腹脹。用肉桂心研末。米糊丸。菘豆大。每服五十丸。酒下。○治重舌_{何方}。蛾口_{何方}。用肉桂末。薑汁調塗患處。木犀花味辛甘苦。氣溫無毒。

寇氏曰木犀花生閩粵江浙山谷中亦是筒桂之類而性大異其葉不似柿葉有有鋸齒如枇杷葉而粗澁者有無鋸齒如梔子葉而光潔者叢生巖嶺間謂之巖桂土人又呼為木犀有三種之分其花白者名銀桂黃者名金桂紅者名丹桂有秋花者有春花者有四季花者有逐月花者其皮薄而不辣白而不赤陰淡而不香不其入藥惟花香馥馨蘊可收曬乾作茗或浸酒或鹽漬可作香茶香墜之類

○木犀花散冷氣消瘀血止腸風血痢之藥也其味苦能

下氣其氣溫能散寒其臭香能破結凡患陰寒冷氣瘦

疝奔豚腹內一切諸冷病蒸熱布裹熨之諸疾皆愈

松脂味苦甘氣溫無毒

別錄曰松脂生太山山中原雖有不及遼塞與衡山者佳以通明如蕭陸香或類粉者為上柏樸子云凡松脂以老松皮內自然流出聚凝及流結根底不見風日者為第一入地深久化為琥珀取者次之炙成者亦不堪用宜六月采雷氏曰修治須鎔化濾去松末及沙石水內冷定而用麻布袋盛入沸湯煮一日取出布袋香水面者用不出袋者不用○李氏曰松樹礫研修聳多節其皮粗厚有鱗其葉二三月抽莢有二針三針五針之別生花長三四寸宋其花蕊為松黃結實狀如荔枝葉成鱗甲秋老則子長甲裂隨風飛散着土便生惟遼海及雲南者子大如巴豆可食謂之海松子詳視果部

○松脂拔毒消癰吸膿去腐肉之藥也其氣溫燥其質粘

泥于外科作散子敷塗或和油煉成膏子貼蓋一切潰

爛敗穢腐肉能排膿血為必用之物故前古土癰疽惡

瘡白禿瘰癧齒牙鼠瘻不過外應敷貼功盡之矣有言

煉久色白如玉服食能潤心肺輕身延年此荒唐不稽之說不可信從如入瘍科敷貼料中可去膿拔毒腐穢初作或初潰者可用如久潰瘍膿血已盡氣虛血寒肉泛而不斂者用此不惟不能生新肌反增潰爛延流皮肉損人筋脉不可勝言用者當細審之

○集方治癰疽惡毒及背發一切腫毒以成膿潰未破出頭者用煉過松脂四兩香油一兩鎔化用銅綠五錢研細末和入用薄油紙攤貼毒上膿血盡出俟膿將淨然後以丹粉膏貼之○治癰疽腫毒潰破膿水淋漓膿頭不出用煉過松脂一兩滴明乳香真沒藥俱放瓦上焙出油各五錢樟腦一錢共爲細末摻入毒內拔膿散毒

○治小兒白禿瘡。用煉過松脂、黃丹各五錢、輕粉三錢。

共為細末。菜油調搽。先用米泔湯洗淨。搽藥。一日一次。

○治癢癢瘡。疥。用煉過松脂五錢、大黃、草蓂各一兩、樟

腦、檳榔各五錢。共為極細末。用猪脂油一兩和研為丸。

加水銀八錢。再研。以水銀散。不見點為度。每遇搔癢疥

癬。以藥丸瘡上摩之。一二次愈。○治蟲蛙牙痛。用煉過

松脂一兩、菜油三錢。火上熬化。將冷凝。加入真蟾酥末

五分。用筋攪勻。取米粒大。內入牙痛隙處。即止。○治鼠

瘦。數眼穿破。內潰不收。用煉過松脂一兩、菜油三錢。火

熬化。加飛過黃丹五錢。用筋攪勻。取膏子。燃成細條子。

內入孔中。膿水拔出。漸乾收口。用人參、黃耆、白朮、當歸

各三錢水煎服即止劑。

○續補方○治風蟲牙痛用松脂一塊滾湯泡化一漱即

止○治一切癩瘡用松脂爲末填孔令滿日三四度○

治小兒頭上軟癩頻發不愈俗名軟癩頭用煉過松脂

八兩銅綠二兩麻油三兩猪膽汁三箇先將松脂火上

鎔化乃下油并膽汁熬勻傾入水內扯拔百遍貯磁器

內遇此患每用細布攤貼不須再換○治婦人白帶久

不愈用煉過松脂五兩酒三升煮乾入木臼內杵細爲

丸梧子大每服卽丸溫酒下○治一切腫毒用煉過松

香八兩銅青八錢蓖麻子仁六兩同搗成膏攤貼未成

卽消已成卽潰甚妙○治一切膿爛瘰癧瘡用煉過松香

四兩葱頭二兩入臼內搗爛加入生豬脂三兩共搗成膏用油單紙攤夾紙貼每日翻換以米泔溫洗半月愈
松實味甘氣溫性和無毒

方氏曰松實出松卵鱗甲屯見前松脂條內又互見果部中

○松實補精髓血氣之藥也陳氏方主風痺寒氣虛羸少

氣諸不足證經云精不足者補之以味甘能益血是已形不足者溫之以氣溫能和氣是已服餌却疾延年除

五勞七傷惟此足以當之然亦久服乃可責其效耳

○集方治風痺寒氣虛羸少氣及五藏勞傷咳嗽吐痰骨

蒸盜汗心神恍惚飲食不甘遺精滑泄等證用松實仁

八兩麥門冬不去心一觔金櫻子枸杞子各八兩熬膏

少加煉蜜收。每早晚白湯調服。十餘茶匙。

松節味苦氣溫無毒。

方氏曰松節出大松樹中。務取以赤黑如漆者佳。

○松節去骨節中風濕之藥也。別錄方主一切風虛風氣

臂膊痠麻。脚膝疼痛。宜釀酒飲之。此係松樹之骨也。質

堅氣勁。久亦不朽。故去筋骨間風濕諸病。但氣溫性燥

如足膝筋骨有風有濕作疼作痠。痿弱無力者。用此立

痊。倘情慾斷喪之人。陰虛髓乏。血燥有火者。宜斟酌用

之。

○集方治脚弱骨節風。以松節釀酒飲。○治週身筋骨內

痛。用松節打碎如豆大。炒焦釀酒飲。○治歷節風痛。四

肢如解脫。以松節十觔。酒三斗。浸二七日。每服一合。日五六服。○治跌撲損傷。用松節煎酒飲。

松葉味苦氣溫無毒。

方氏曰。松葉又名松毛。叢聳上枝。宛如鬚髮。有二莖三莖五莖之異。

松毛去風濕。瘰癧。惡疾之藥也。大氏方云。松毛性燥質利。炒黑善去風濕。頑癬。濕爛。浸漬不乾。并敷冬月凍瘡。生取搗爛作丸。能治大風癩疾。或歷節風痛。或脚氣痿痺。或頭風頭痛等證。已上敷病。凡關風濕致患者。相宜。倘因血虛風燥致病者。禁用之。

○集方治風濕頑癬。用松毛炒黑一兩。和輕粉樟腦各三錢。濕則乾。摻燥則用油調。搽如癢極者。以米醋調敷。并

治凍瘡如濕爛者乾腫者作癢者悉依頑癬同法○治
大風癩瘡用松毛取生新者搗爛焙燥每用松毛二兩
枸杞子二兩浸酒飲時時服不得大醉久服効并治歷
節風痛脚弱痿痺○治頭風頭痛方脈正氣用生鮮松毛四兩搗
爛焙燥浸酒時時飲之其渣取出貼頂門用布裹頭三
日乃愈。

松花味甘氣溫無毒。

方氏曰松花即松黃拂取之似
蒲黃功用勝如脂仁及葉也
要按本草

○松花輕清涼滑療久痢解酒毒清血熱之藥也土人及
時拂取和白米芡實白糖調勻印為糕餅作茶饌食之
大能養胃清鬱熱越東風俗以此款實曆稟聞所時尚

也。

○集方治痘瘡癰塌破損血出或皮裂藥流用松花摻之

卽乾○治久痢不止延及數月纏綿不淨用松花每服

三錢食前米湯調下○治酒毒發作頭痛目

眩或咽喉閉悶或下利清水日數十行形神委頓庸工

陰寒自利妄用溫燥熱藥者多有之用松花一兩焙陳皮五錢川黃連三

錢甘草二錢俱微炒磨爲末與松花和勻每早晚各服

二錢白湯調服二日卽愈。

治吐血胸中氣塞。吐出血紫黑色成塊者。是瘀血也。用
松花、茜草、根、桃仁、大黃、枳殼各一錢。○治吐血遇勞即
作者。是勞傷動血也。用松花、人參、白朮、白芍藥、麥門冬、
生地、黃芩各一錢。○治衄血不止。出於肺也。用松花、黃
根、黑山梔、黃芩、桔梗、甘草、人參、生地、黃芩、桑皮各一錢。○
一兩。○治咳血不止。出於肺也。用松花、川貝、母、生地、黃
桑皮、款冬花、天麥二冬各一錢。五分。甘草一錢。○治咯
血不止。出于腎也。咯出血。用松花、生熟二地、天麥二
冬、阿膠各二錢。紫苑、知母、黃柏各一錢。○治唾血不止
出于胃也。鮮血隨唾而出者。用松花、茜草、黃芩、茯苓、
母、天麥二冬、杜仲、生地、黃柏、餅各二錢。甘草七分。炮薑
灰入分。○治溺血不止。心後熱于小腸也。用松花、生地、
黃、黃芩、茶、黃柏、黑山梔、知母、木通、甘草、天門冬、川黃連、福
蓄、炭、苓、燈心各二錢。○治便血不止。大腸出血。蘇府、蘊
積、淫熱也。用松花、茜草、根、側柏、葉、炒、槐、角、地、榆、阿膠、當
歸、生地各二錢。黃柏、白芍藥、蒼朮、黑山梔、川芎各一錢。
此方不問糞前糞後。并腸風下血。拉皆治之。

栝子仁味甘氣平無毒入足厥陰少陰又入手少陰經

陶隱居曰栝處處有之當以太山陝州宜州乾陽者為最四時長青葉皆側生枝皆西向有四種一曰叢栝枝

葉叢登今人呼為千頭栝一曰渾栝獨葉叢茂木心紫

赤一曰刺栝枝皆有刺撫之戟手皆不結實惟其作香

不入藥用一曰扁栝木心微白芳香清烈作花細小結

實有角角四裂出子霜後采取中仁黃白色最多脂液

性乾陵者木理旋繞有雲氣山水鳥獸狀

修治蒸熟去皮殼搗作餅子日乾收用

○栝子仁潤燥補髓養心神定驚悸之藥也此藥氣極芬

芳則脾胃所喜質極潤澤則肝腎所宜故前古謂安養

五藏主驚悸定心神悅顏色聰耳目為延年却病之上

劑也但體質多油腸滑作瀉者勿服膈間多痰者勿服

陽道妄舉腎家有熱者勿服巴油者能令哮喘勿入藥

用

李蘋湖先生曰按六書精蘊云萬木皆向陽而栢獨西
指蓋陰木而有貞德者不畏霜雪得木之正氣也又坤
雅云栢之指西猶臧之指南也

○集方治心神虛怯腎髓衰乏驚悸怔忡志意恍惚或睡
臥不寧或虛煩懊懣等證用栢子仁二兩研人參茯苓
當歸川芎半夏遠志棗仁白朮俱炒各一兩二錢川黃
連酒炒五錢共爲末煉蜜丸栢桐子大每早晚各服三
錢白湯下○治小兒_{氏方}癰啼驚癩腹滿大便如青苔色用
栢子仁研末白湯調服一錢○治黃水濕瘡用真栢油
二兩熬稠搽之立愈

側栢葉味苦澁氣微寒無毒

謂氏曰：栢葉有花栢葉、叢栢葉及有子則葉其有子則葉成片如大片雲母葉皆側形。葉上有微赤毛者宜入藥用。加采葉須隨四時處方。春採東夏採南，秋採西，冬採北。取其得月令之氣也。

○側栢葉止流血去風濕之藥也。凡吐血、衄血、崩血、淋血、血熱流溢于外絡者，搗汁服之立止。凡歷節風痛、週身走注痛極不能轉動者，煮汁飲之，卽定。惟熱傷血分與風濕傷筋脈者，兩病專司其用，但性味苦寒多燥，如血病係熱極妄行者可用。如陰虛肺燥因咳動血者勿用也。如痺病係風濕閉滯者可用。如肝腎兩虧血枯髓敗者勿用也。司業者當熟審之。

盧子由先生曰：扁栢芳香高潔，文彩陸離，卽叅天直上，誰能禁之。乃俛焉西向，以順受金制，可謂至德也已。巨

肇喬木作社稷棟梁宜哉殷人以栢其通知後世之西
向乎

○集方治吐血天多華切血不止或血崩血淋諸血熱證用新鮮

側栢葉五錢白芍藥懷生地真阿膠各三錢甘草八分

水煎服○治歷節風痛痛如虎咬走注週身不能轉動

動即痛極晝夜不寧用側栢葉五錢木通當歸紅花羌

活防風各二錢水煎服

○續集方治小兒洞痢用側栢葉炒黃煎湯代茶○治蠱

痢下血黑色或茶脚色或膿血如靛色用側栢葉川黃

連俱微炒各等分共為末每服一錢空心白湯調下治

腸風亦効○治酒毒下血或下痢用嫩側栢葉九蒸九

晒二兩陳槐花炒焦一兩為末煉蜜丸梧子大每空心

白湯下百丸○治中風不省人事得病之日便進此藥

可使風退氣和不成廢人用側栢葉一握去枝葱白一

握連根研如泥無灰酒一升煎一二十沸服如不飲酒

人分作四五服服完方進他藥

胡桐淚味鹹苦氣大寒無毒氣味俱厚陰中之陰也入足

陽明經

蘇氏曰胡桐淚出肅州以西平澤或山谷中今涼州亦有之其樹高大皮葉似白楊桐桑輩故名木堪作器用其脂液下地與土石間木相雜狀如黃礬而堅實得水即消礬若礬石消石之類冬明燥之

○胡桐淚降火熱清痰結之藥也經曰熱淫于內治以鹹

寒如急患大熱火毒咽喉口齒腫脹不通或心腹煩滿而脹者用此鹹能潤下苦能湧上或下而愈或吐而痊取効甚捷滑氏方又治熱極急黃黑汗黃汗諸證皆資其鹹苦而寒能除極熱之病耳然性善湧泄如胃家虛

實不食者勿用

○治^{麻和粉方}咽^喉急^方脹腫結不通用胡桐淚三錢礪砂二錢生礬一錢膽星一錢五分共為末用一二茶匙薑湯調^{下金方}服○治人患急黃或黑汗黃汗用胡桐淚三錢漸消而通○治牛馬病急黃黑汗黃汗用胡桐淚一錢白湯調服○治牛馬病急黃黑汗黃汗用胡桐淚一二兩研細末水調灌之立愈

杉木味辛苦氣溫無毒可升可降陽也入足陽明經

蘇氏曰杉木生江南深山中木類松而徑直葉硬扁如刺附枝生結實如楓實江南人以驚蟄前後分枝插種出蜀黔及諸峒所產者更良其木有赤白二種赤杉實而多油白杉虛而潔燥有斑紋如雉尾者作棺尤貴不生白蠟郭氏云真杉木可以為船為棺及作屋柱埋入土中不易朽壞燒炭拌硝黃作火藥甚速

○杉木去惡氣消脹氣下脚氣之藥也別錄方煮湯外洗

治風濕毒瘡腫滿脚氣又大氏方煎汁內服治奔豚上

氣心腹冲脹等疾以辛溫直達開發升竄之性若毒瘡

若脚氣若脹滿若奔豚四者皆屬五氣壅逆不升不降

之故此藥氣味芬芳能下逆氣散毒邪有開達內出之

功大能發揚火鬱疎申肝令獨擅其長者矣奈世人舍

近求遠深可慨也

前賢柳氏云某得脚氣夜半痞絕脇有塊大如石困不知人。搗楊上視三日。榮陽令醫用杉木節。橘樹葉各三兩。大腹子七枚。俱切碎。童子小便三大碗。水一碗。共煮至碗半。徐徐灌之。少頃大下三行。卽氣通塊散。人事復甦。

○集方治平人無故腹脹卒然成蠱。此時行惡毒之氣也。

用真杉木片四兩。和真紫蘇葉三兩煎湯飲之。○治脚氣腫滿。用真杉木片二兩。牛膝木瓜檳榔各一兩。煮湯淋洗三四次。愈。○治遍身風濕毒瘡。或癢或痛。或乾或濕。用真杉木片八兩。煎湯浸洗。自消。○治奔豚瘕疝。沖築脹悶疼痛。用真杉木片二兩。吳茱萸青皮小茴香橘

核各八錢。乾薑五錢。煎汁飲。○治筋霍亂脚氣。用真杉木片二兩。香薷木瓜各一兩。煎湯溫飲。○治廉瘡黑爛。用多年老杉木節燒灰。研末。麻油調。隔油單紙攤貼。紮定。數換即愈。○治小兒陰腫赤痛。日夜啼哭。用真杉木燒灰三錢。入鉛粉一錢。清油調搽。即安。

樟木。味辛。氣溫。無毒。

李氏曰。樟木。西南處處。山谷有之。其木理細而錯。縱有紋。故名樟。木高丈餘。葉小似楠而尖長。背有黃赤茸毛。四時不凋。夏開細花。結小子。木大者數抱。宜于雕刻器。○樟有大小二種。紫淡二色。外有釣樟。即樟之小者。二樟一類二種。生植七年。乃可分別。

○樟木辟邪氣。解中惡。定霍亂之藥也。此物辛香竄烈。能發胃中停痰。食。吞吐酸水。伏飲積滯等證。又煎湯浴。

脚氣洗疥癩能祛風逐濕湧而善升能達木鬱之病如胃虛中氣弱者禁用。

○集方治霍亂及乾霍亂煩吐者以樟木屑三五合煎濃汁飲之即吐甚良又中惡鬼氣卒死者以樟木屑燒烟薰之即甦○治手足痛風痛如虎咬用樟木屑數升煎湯乘熱用布蘸湯熨洗安手足于湯上薰之或坐湯桶上以草薦圍住蒸之其效甚速

○釣樟又名烏樟即樟木之小者氣味功用與樟木主治同惟治金瘡出血不止刮末敷之甚驗又特異于樟木也

辛夷味辛氣溫無毒氣味俱薄浮而散陽也入手太陰足

陽明經

別錄曰辛夷生漢中魏興梁州山谷今江浙處處有之
人家園圃中多種植樹高二三丈枝條繁茂極剛又脆
二三月開花花山枝頭有紫白二色花落方生葉葉間
隨舍花茁經夏秋歷冬其苗漸大長半寸而尖銳苗外
有苞重重有青黃茸毛順鋪苗形如小毛桃開花時脫
苞花似蓮花大如茶盞如蘭花香白者呼為玉蘭紫者
呼為紫蘭更有千瓣者以紫花之莖為貴年淺者有花
無子經三十年方結實也修治用粗布拭淨莖上毛以
沸水浸半日焙乾川

○辛夷溫肺氣通鼻竅之藥也故善走三陽除風寒風濕

于頭面耳鼻齒牙諸分若頭眩昏目兀兀如欲嘔若面

腫面癢隱隱如蟲行若耳閉耳鳴或癢或痛若鼻淵鼻

塞或脹或瘡若齒痛齒腫或牙齦浮爛等證咸宜用之

此藥辛溫上達能解肌散表芳香清潔能上竄頭目逐陽分之風邪疎內竅之寒鬱則諸證自愈矣前古謂通九竅利五藏通關脉退寒熱意在斯乎但辛香浮竄氣虛之人雖偶感風寒致諸竅不通者不宜用頭腦痛屬血虛火熾者不宜用齒牙痛與耳病屬肝火胃火者不宜用

李士材先生曰肺開竅于鼻而胃脉環鼻上行凡中氣不足清陽不升則頭痛而九竅不利辛夷稟春陽之氣味薄而散能助胃中清氣上達高巔故頭面九竅皆歸

于治平也

○集方治頭眩昏冒欲嘔此屬寒痰也用辛夷一兩製半

夏瀘星、天麻、乾薑、川芎各八錢，爲末，水發爲丸，每晚服

三錢，白湯下。○治頭面腫癢如蟲行，此屬風痰也。用辛

夷一兩，白附子半，夏、天、花、粉、白芷、殭蠶、玄參、赤芍各五

錢，薄荷八錢，分作十劑服。○治耳閉不通，或虛鳴如雨

響，或耳內作癢作痛，用辛夷、黃芩、柴胡、川芎、半夏、甘草

各五錢，爲末，每晚服三錢，白湯調下。如腎虛亦有耳閉

耳鳴作癢作痛者，用辛夷二兩，配入六味地黃丸料中，

每服五錢，臨睡白湯送下。○治鼻淵鼻塞，用辛夷、甘草

各一兩，蒼耳子八兩，甘菊花二兩，俱炒，江魚齒一兩五

錢，膠泥裹，火內燒紅，去泥，俱爲細末，每晚服三錢，白湯

調下。○治鼻內作膿，或生瘡，此係酒毒者多，用辛夷一

兩川黃連五錢連翹二兩俱微炒研爲末每飯後服三錢白湯下治齒牙作痛或腫或牙齦浮爛用辛夷一兩蛇床子二兩青鹽五錢共爲末摻之

沉香味辛氣溫臭香無毒氣厚味薄可升可降陽也入足陽明太陰少陰兼入手少陰足厥陰經性平辛辣者性

燕

蘇氏曰沉香生天竺諸國及海南游北占城真嶼黎峒等處寇氏曰嶺南諸處悉有傍海處尤多奇餘連枝崗嶺相接木理虛柔凌冬不凋小者拱抱大者數圍體如白楊葉如橘柚花如蕤蕤實如小檳皮膜可作紙未經斧斤者雖百歲之木亦不孕香若半老之木其斜枝曲輪斫鑿成坎雨露浸漬斯膏瓜凝聚漸積成香李氏曰凡三等其一即斫鑿之坎氣聚色變木端棕透切而取之入水輕浮者為黃熟其二津沫營注木理堅實剝而取之入水或滄或半浮者為棧香棧香速香也其三脂液所鍾蘊結成塊或自脫或解取人水沈底者為沈香品亦凡四曰熟結曰生結曰脫落曰蟲漏蟲漏者因蠹噬而結也脫落者因水朽而結也生結者因斫鑿而結也熟結者因自斫而結也故熟結一名死結死結則全體膏膩凝聚成香此等之至上品之至貴者也顧四結總屬一木奇狀甚多凡四十有二如角沉華沉黃沉烏沉水盤承露青桂黃蠟價栗葦菌靈芝金絡葉子麻葉

本草綱目

卷之八

沉香

七

竹箴機梭附于馬蹄牛頭燕口蝟刺龍鱗鳥刺虎脛雞
 骨蓬萊虎斑弄水龜鶴斑仙人杖及為柞為白為肘為
 拳為山石為檉柞為鳳雀龜蛇雲氣人物種種肖象既
 所稟不作亦復優劣有異各俟其形全氣足而後采取
 功力始備今嶺南人不耐其成每多趨利伐賊之害惟
 瑯管黎人非時不妄剪鑿故屢獲異香雖纖薄如紙入
 水亦沉萬安黎母山東峒者更冠絕天下一片嘗值萬
 錢以東峒日鍾朝陽之氣其香更幽醞于他產耳若船
 上來者臭多辛烈尾烟必焦交趾海北者更甚故南人
 不甚重之此皆沉香等品奇狀也盧氏曰又奇南香原
 屬沉香同類因樹分北牡則陰陽形質臭味情性各各
 差別其成沉之本為北為陰故味苦厚性通利臭含藏
 然之臭轉勝陰體而陽用藏精而起亟也成奇南之本
 為牡為陽故味辛辣臭顯發性禁止繫之閉二便陽體
 而陰用衛外而為固也至若等分黃棧品成四結狀肖
 四十有二則一矣第此多牡也獨奇南世稱至貴即黃
 棧二等亦得因之以論高下沉本黃熟固坎端棕淺
 而材白臭亦易散奇本黃熟不惟棕透而黃質遠理猶
 如熟色遠勝生香熟炙經旬尚襲襲難過也棧即奇南
 液重者曰金絲其熟結生結蟲漏脫落四品雖統稱奇
 南結而四品之中又各分別油結糖結蜜結綠結金絲
 結為熟為生為漏為滲井然成秩耳大都沉香所重在

質故通體作香入水便沉。奇南雖結同四品不惟味極
辛辣。着舌便木。頭四結之中每必抱木。曰油。曰糖。曰蜜。
曰綠。曰金。絲。色相生成。亦迥別也。雷氏曰。凡使沉香須
要不拈知。紫角硬重。沉沒水下者為上。用紙裏懷中候
煖乳研易
于成粉。

○沉香降氣溫中之藥也。此劑得雨露清陽之氣最久。其

味辛其氣溫其性堅結木體而金質者也善治一切衝

逆不順之氣上而至天肺下而及泉腎故上氣壅者可

降下氣逆者可和與諸藥為配最相宜也滑氏本草治

上熱下寒上盛下虛或濁氣不降清氣不升為病逆氣

喘急或大腸虛閉小便不通或男子精寒婦人血冷大

能調中利五藏壯元陽補腎命方書屢用有效然氣味

辛溫香竄治諸冷氣逆氣鬱氣結殊為專功如中氣

虛勞。氣不歸元者。心鬱不舒。由于火邪者。命門真火衰。

由于精耗血竭者。俱忌用之。前古謂能殺鬼邪。解中惡。

清人神。消風水毒腫。並宜酒煮服之。此不過因其辛陽。

香散。辟此陰凝不正之氣故也。如病陰虛氣逆上者。此

○集方治壅氣衝逆不能下降。為脹滿。為喘促。為心胃不

通。或痛。或痞者。用沉香磨汁數分。以杏仁大腹皮茯苓。

廣陳皮。川貝母。各一錢五分。製半夏一錢。甘草五分。水

煎。和沉香汁服。內熱者。加川黃連。枯黃芩。各一錢。內寒

者。加乾薑。木香。砂仁。各一錢。此氣虛而上逆者。加入參。

白朮。各一錢五分。○治肺氣壅逆不下。用沉香磨汁數

分。以杏仁。桔梗。桑白皮。廣陳皮。白前。茯苓。各一錢。水煎。

和沉香汁服。○治陰虛腎氣不歸原用沉香磨汁數分以麥門冬、懷熟地各三錢、茯苓、山藥、山茱萸、肉各二錢、牡丹皮、澤瀉、廣陳皮各一錢、水煎和沉香汁服。○治上熱下寒有二法。一法用沉香磨汁一錢以半夏薑製一錢五分、附子、童便製三錢、白朮、炒肉桂各二錢、水煎和沉香汁頓冷服。此引陽下降則寒自去。一法用沉香磨汁一錢以半夏薑製一錢五分、川黃連、楮黃芩、天花粉、連翹、石膏各三錢、水煎和沉香汁頓熱服。此瀉陽下泄使陰氣上升陰陽和而不上不熱下不寒矣。○治上盛下虛亦有二法。一法用沉香磨汁一錢以蘇子、杏仁、廣陳皮、桑白皮、厚樸、枳殼、車前、木通、茯苓各二錢、水煎和沉

香汁服降其上盛之氣則下虛自愈。一法用沉香磨末

一兩以人參鹿茸補骨脂懷熟地枸杞子山茱萸虎脛

骨川草薺川石斛牛膝山藥肉桂當歸小茴香俱鹽酒

洗炒各二兩研為末煉蜜丸梧桐子大每早服五錢白

湯下峻補其下則上盛自平下虛自愈。○治濁氣不降

清氣不升用沉香磨汁一錢木香茯苓車前子厚樸

枳實升麻真蘇子杏仁廣陳皮白前白芥子各一錢五分

水煎和沉香汁服。○治大腸氣滯虛閉不行用沉香磨

汁八分以當歸枳殼杏仁泥肉蓯蓉各三錢紫苑一兩

水煎和沉香汁服。○治膀胱氣滯虛澀小水不通用沉

香磨汁一錢以茯苓車前子牛膝燈心甘草瞿麥麥門

冬地骨皮各二錢。木香八分。水煎。和沉香汁服。○治男
 子精寒不嗣。平本卷手集婦人血冷不育。川沉香磨末一兩。鹿茸
 一對。黃耆。白朮。枸杞子。懷熟地。山茱萸。覆盆子。補骨脂。
 北五味子。九製何首烏。當歸。川芎。俱酒洗炒。各四兩。磨
 為末。以黑豆濃汁。煮紫河車二具。搗爛成膏。為丸。如黍
 米大。每早服五錢。酒下。○治心神不足。玉環百一火不降。水不升。
 健忘驚悸。用沉香。人參。各五錢。茯神二兩。共為末。煉蜜
 丸。如梧桐子大。每早晚各服百丸。白湯下。○治轉胞不
 通。元非小腸膀胱厥陰受病。乃強忍房事。或過忍小便所
 致。當治其氣則愈。非利藥可通也。用沉香。木香。各二錢。
 為末。空心用白湯調服。○治腎家虛冷。目暗不明。宜暖

水藏用沉香一兩真川椒去子炒出汗四兩共爲末酒糊丸梧子大每服六十九空心淡鹽湯下。○治胃冷作嘔用沉香真紫蘇葉白豆蔻仁各一錢共爲末每服七分柿蒂湯調服。

奇南香味辛辣氣溫無毒其生成出處主治功用與沉香同但性氣較沉香稍潤緩耳氣惟含攝能縮大便今講官入值經筵常佩此香以免泄氣。

丁香。味辛甘苦。氣熱無毒。純陽。氣厚味薄。入手太陰。足少陰。陽明經。

蘇氏曰。按廣志云。丁香出東海及崑崙國。今交廣南番亦有。其樹高丈餘。凌冬不凋。木類桂。又似栗。葉似檉花。似梅。花色黃。結實如山茱萸。色紫黑。形兩合。可分剖。開如雞舌。故又名雞舌香。八月采。又云。盛冬生花。至次年方采實。又一說是草類。蔓生。今乳香中揀出一種。如棗核。堅硬。嚼之無味。燒亦不香。乃番棗核也。

○丁香。煖胃溫脾。回陽逐冷之藥也。故方氏方主除嘔吐。止泄瀉。理腹痛。去呃忒。散奔豚。逐疝氣。辟鬼疰。截瘧痢。煖腰膝。壯元陽。乃溫中建陽之品。凡諸陰寒水冷之邪。爲患。咸需用之。又按開寶方。治齒疳。蟲齩口臭。胡氣及痘瘡寒陷。灰白不發。諸證。亦取此辛溫純陽。健烈之力。而香竄又能走毒。除穢。潤發新陽。故也。如以上諸證。

須真虛寒者。方可投入。如兼內熱。有火證者。槩勿施用。若陳氏方。治痘瘡濕爛不起發。或腹脹泄瀉。四肢冷逆。表裏俱虛寒之象。並用木香散。異攻散。倍加丁香。肉桂。亦有愈者。卽有此證。然必運氣在寒水司天之際。又值嚴冬極冷之時。用此大辛熱之藥發之可也。若不識時辨證。一槩用此。不惟不能生全。反遭流謗。慎之慎之。

○集方治胃寒嘔吐九方集此方並詳本草切要白朮製半夏。廣陳皮。

白茯苓各二錢。俱炒黃研末。每服二錢。白湯下。○治脾

胃虛寒。作泄瀉。用母丁香五錢。廣陳皮。白茯苓。藿香梗。

紫厚樸。訶子肉。各三錢。俱炒過。研爲末。每早服二錢。米

湯下。○治陰寒腹痛。兼四肢厥逆。自汗自利者。用母丁

香三錢。人參黃耆白朮肉桂木香各二錢。甘草一錢。俱
微炒。研爲末。作散服。白湯調下。數錢。或水煎服。亦可。○
治陰寒呃忒。用母丁香二錢爲末。柿蒂十箇。煎湯調服。
○治奔豚。或疝氣疼痛。用母丁香一錢五分。吳萸乾薑
炙甘草各一錢。青皮七分。花椒一錢二分。水煎服。○治
鬼疰。身似痛非痛。似癢非癢。似寒非寒。似熱非熱。似睡
非睡。似醒非醒。形神默默。語言懶出。病名鬼疰。此心胃
有伏痰所致。用母丁香一錢。膽星製半夏白茯苓各二
錢。共爲末。每早晚各服一錢。燈心湯下。○治虛癯久不
止。寒多不渴者。用母丁香一錢爲末。於白朮炒當歸身
柴胡牛膝乾薑各二錢。水煎服。○治久痢胃寒脾冷虛

滑不止。用母丁香、茯苓、於白朮、訶子肉、白扁豆俱炒燥爲末。每早服一錢。米湯調下。○治腰膝寒冷、并痿弱無力者。用母丁香五錢、金毛狗脊、於白朮、黃耆、當歸身、牛膝、枸杞子、川草薢、木瓜、大茴香各二兩。俱酒洗炒。研爲末。懷熟地四兩。酒浸蒸搗膏。共爲丸。梧桐子大。每早晚各服三錢。白湯下。

○續集方。治胃冷嘔逆、氣厥不通用母丁香三枚、陳皮二錢、水煎熱服。○治齒牙疳臭、或黑蛀。用母丁香煮汁含之。○治小兒冷疳、面黃腹大、食卽吐者。用母丁香七枚爲末。乳汁和飯鍋上蒸三次。每用薑湯調服五分。○治食蟹傷脾、腹痛。或作瀉。用母丁香一錢爲末。薑湯調服。

○治食魚腥生冷瓜菓致傷用母丁香三錢陳皮一錢
共為末每服八分薑湯調服○治婦人陰冷用母丁香
三顆為末紗囊盛納入陰中即煖○治鼻生瘰肉用母
丁香綿裹納之○治腋下胡臭用母丁香末不時搽之
久用漸除

丁香枝皮味氣與香同攻一切冷氣為病如心腹脹滿
惡心嘔吐泄瀉虛滑水穀不消諸證並宜水煮服之

治疝氣一切諸證。多因熱鬱于中。寒束于外。而成。用
 香五分。木香。砂仁。茴香。香附。玄胡索。當歸。蒼朮。黑山梔
 川烏。各一錢。水煎。冷服。如挾外邪。發熱惡寒。頭痛者。本
 方加熟艾。煎胡。如大便久閉。結不通者。加酒製大黃。服
 閉者。加枳實。厚朴。有瘀血者。加桃仁。紅花。腎氣注上氣
 閉。如絕者。加沉香。枳實。四散厥逆。白汗。脈沉者。加製附
 子。人參。當歸。○大凡疝氣一病。有六種。腸中走氣。作聲
 或痛者。是盤腸氣也。加青皮。陰囊手按作響。聲痛者。是
 勝疝氣也。加澤瀉。瀉。勝旁一梗。升上。鈞痛者。是小腸氣也。
 加藜蘆。小腹下注。上奔心腹。急痛者。是腎氣逆也。加吳
 茱萸。陰子。偏大者。是偏墜也。加荔枝。枝。火燒。酒淬。陰子
 雖硬。大而。不痛者。是木腎氣也。服前方加矣。一切疝氣
 發于暑月者。多兼暑氣。入膀胱也。加香薷。滑石。一切疝
 氣。年久不愈者。前方而加者。虎歸地。治陰囊皮漏。出水
 外用。丁香。香川。辣子。各等分。為極細末。搽之。

檀香味辛苦。氣溫無毒。陽中微陰。入手太陰。足少陰。陽明

經

李氏曰。按大明一統志云。檀香出占城。真臘。暹羅。三佛齊。回回等國。今廣東。雲南及嶺南諸處亦有之。葉如荔枝。皮青色滑澤。又香譜云。皮買而色青者。黃檀。皮潔而色白者。為白檀。皮腐而色紫黑者。為紫檀。其木俱堅重清香。而白檀更良。藏者以綿紙封固。不洩氣。又格古論云。紫檀諸溪。明出性堅。新者色紅。舊者色紫。有蟹爪紋。俱可作帶圍。扇骨等物。白檀多供然。蕤非上品。沉水者。不得入藥。

○白檀香辟惡氣散結氣除冷氣伏妖邪鬼氣之藥也。辛

香開發能升生胃氣。元素方通噎隔。進飲食。除心腹冷

痛。散陰寒霍亂諸證。入調氣藥中。引芳香之物。上至極

高之分。胸膈之上。咽喉之間。為理氣之妙劑也。但辛香

芳烈而竄。如陰虛火盛。有動血致嗽者。勿用之。

○集方治噎隔飲食不入用白檀香一錢五分茯苓橘紅
 各二錢俱為極細末入參湯調下。○治心腹冷痛用白
 檀香三錢為極細末乾薑五錢泡湯調下。○治陰寒霍
 亂用白檀香藿香梗木香肉桂各一錢五分為極細末
 ○每用一錢炒薑五錢泡湯調下。○治男婦為妖鬼所憑
 如癡如醉人事昏迷以檀香末臥牀前燒薰則邪魅自
 退。

○紫檀味苦鹹氣寒無毒。

此紫檀散風毒活瘀血之藥也。陶氏方利未傳金瘡止
 血定痛又醋磨汁傳一切卒腫。因血滯所為者立驗。
 李贛湖先生曰白檀辛溫氣分之藥也故能理衛氣而
 調脾胃利胸膈却陰寒霍亂紫檀鹹寒血分之藥也故
 能和營氣而消腫毒。
 治金瘡止血定痛。

降真香味辛甘氣溫無毒

李氏珣曰降真香出黔南山海中及大秦國似蘇方木
燒之不甚香得諸香和之則特美入藥以番降紫而潤
者為良李蘋湖曰今廣東廣西雲南安南漢中施州永
順保靖及占城暹羅渤泥琉球諸番皆有之又溪蠻志
云降真香本出海南今溪峒僻處所出者似是而非勁
瘦如雞骨不甚香又真臘志云降真香生深林番人頗
費砍伐之力乃樹心也其外有白皮厚五六寸焚之氣
勁而遠又草木狀云降真香長莖細葉根極堅實重重
有皮花白子黑其莖鋸截置烟焰中經火成紫香可降
神按此數說前後似同而稍異或中國者與番外來者
有不
同乎

○降真香辟邪氣活瘀血之藥也李氏方療折傷活血止

痛治金瘡止血生肌內服外敷俱有驗也又治天時疫

癘癘瘡災疾并一切妖神怪異宅舍中焚燒盡皆屏跡

○集方治折跌并金瘡血出不止或潰爛不收用真降香

以鋒刀刮下細末敷之縛定內服數錢乳香湯調服甚
 効○治上部有傷瘀血停積按之胸膈作痛此吐血候
 也急以降真香鋒刀刮末白湯調服立時消散凡怒氣
 傷肝致吐血不止用此功過鬱金。

楠木味辛氣溫無毒。

李氏曰楠木生南方而黔滇蜀廣諸山尤多其樹直上
 枝葉疊疊若幢蓋之狀茂似樟而大如牛耳經歲不凋
 新陳相換其花赤黃色實似丁香香色青綠甚端偉高者
 十餘丈巨者數十圍氣甚芬芳為船為梁棟為器具皆
 佳色赤者堅白者稍脆居木久則中空為蟻所穴其近
 根年深向陽者結成花草山水之狀俗呼為散栢楠可
 作器。

○楠木利水下氣之藥也別錄方治時行暑濕所傷霍亂
 吐下煮汁服之又轉筋脚氣腫痛不寧煎湯淋洗凡取
 木及枝葉根四
 件主治同功。

烏藥味辛苦氣溫無毒可升可降氣厚于味陽也入足陽
明少陰經

陳氏曰烏藥生嶺南邕州容州及江南蘇氏曰今台州
衡州雷州亦有之俗以天台者為勝又不及海南者堅
實而力大其木似樟而矮根葉亦以樟氣高八九尺吳
楚山中極多土人以為薪一葉三極葉尖而微圓面青
背白狀類鱗鱗四五月間花細碎淡黃灰白色六七月
結子似冬青子生青熟紫核殼浮薄仁苦而微香根不
甚大形如芍藥葉者肉白老者色黑粥中
心有車轂紋形如連珠者佳八月采根用

○烏藥調氣和血之藥也辛溫香竄能散諸氣故方氏方
主風氣周身頑麻搔癢或風寒濕熱四氣所侵或身重
體疼寒熱交作或風濕流注腫毒破潰或鬱結脹滿表
裏壅塞或胎前產後血氣不和或血閉不行癥瘕積聚
用此大溫之劑自能行氣中之血則諸證自除也局方

治中風宗氣用烏藥順氣散。以此則氣順而風散也。濟生方。治七情鬱結。上氣喘急。用四磨湯。以此降中兼升。瀉中兼補也。補陰丸。以此下通少陰腎經。上通脾胃元氣。故丹溪方中往往用之。又凌氏方。謂此藥治一切氣。除一切寒。消一切食。調一切血。婦人溫經。非此不行。小兒諸蟲。非此不去。大人諸痛。謂疝癖心胃之痛。非此不除。宜白湯磨汁服之。更勝于水煎服也。但辛香溫燥散氣。頗捷。凡屬氣虛內熱者。忌之。

繆仲醇先生曰。世人多以烏藥香附同用。治女人一切氣病。不知氣有虛有實。有寒有熱。冷氣暴氣用之固宜。如氣虛氣熱。用之能無貽悞耶。以故婦人月事先期小

便短赤。及咳嗽內熱。口乾舌苦。不得眠。一切陰虛內熱之病。皆不宜服。

○集方治風痰風氣不拘週身上下頭面四肢等處頑痺

麻木用烏藥二兩木香五錢防風白朮秦艽天麻當歸

川芎枸杞黃柏黃耆白芥子各一兩俱用酒洗炒研爲

末煉蜜丸梧子大每早晚各服三錢白湯下○治中風

中濕遍身作疼時發寒熱用烏藥防風歲蕤羌活各三

錢水煎服○治風濕流注遍身生毒上下腫潰用烏藥

二兩香附白朮川芎木瓜牛膝當歸黃耆各三錢水煎

服如陽衰胃弱血氣虛冷者本方可加人參附子黃便

製各一錢○治七情鬱結胸膈脹滿表裏壅塞用烏藥

川芎、香附、俱酒炒。各三錢。枳殼、厚樸、半夏、陳皮、茯苓、各二錢。水煎服。○治胎前產後血氣不和、腹脹腹痛。用烏藥、香附、當歸、川芎、俱酒炒。各三錢。水煎服。○治婦人女子無故血閉不行、肚腹脹悶、或成癥瘕、血塊。用烏藥、香附、三稜、莪朮、玄胡索、炙甘草、廣陳皮、各五錢。俱酒洗炒。研為末。每早服三錢。白湯調下。○治中風中氣。用烏藥一兩、白朮八錢、白芷、陳皮、川芎、麻黃、乾薑、桔梗、枳殼、殭蠶、甘草、各一錢。俱炒燥。研為末。每服一錢。白湯調下。名烏藥散○治七情鬱結、上氣喘急。用烏藥、沉香、檀榔、人參、各磨濃汁。共七分。徐徐嚙之。名烏藥湯○治陰虛氣滯、脾胃不調。此藥上達胃脾、下通腎經。用烏藥、北五味子、各二

兩枸杞子、杜仲、牛膝、當歸、白芍藥、懷熟地、黃柏、知母、山
茱萸肉各二兩俱用鹽酒拌炒。研爲末。煉蜜丸。梧桐子
大每早服五錢白湯下。名補
衛生家寶
陰丸

續補集方治一切氣痛不拘男婦。冷氣、血氣、肥氣、痞氣、
息賁氣、伏梁氣、奔豚氣、胃痛氣、及脚氣、疝氣、一切搶心
刺痛、冷汗、喘急欲絕。用天台烏藥、小茴香、青皮、良薑各
四兩俱酒拌炒。研爲末。每遇此急。用白湯調服一錢。
烏藥子治陰毒傷寒。腹痛欲死。取一合炒至黑烟起。投
水中煎十餘沸。服一大盞。汗出止。陽回卽瘥。

治婦人經水

治婦人經水將來作痛者或乍作乍止血滯氣滯也用

烏藥當歸川芎白芍藥川黃連香附桃仁去皮各一錢

五分紅花玄胡索牡丹皮莪朮各一錢俱用酒拌炒過

水二碗煎一碗食前服十帖全愈治婦人經水不行

久不止者將成血崩也用烏藥當歸川芎白芍藥生地

黃白朮黃芩黑山梔地榆黑荆芥香附人參白茯苓各

一錢五分甘草五分俱用醋拌炒過水二碗煎八分食

前服十劑愈治婦人經水不行發腫者血瘀滲入

脾經用烏藥當歸川芎白芍藥桃仁去皮紅花牡丹皮

乾薑肉桂乾漆枳殼白朮香附牛膝玄胡索各一錢五

分俱用酒拌炒過水二碗煎八分食前服五劑愈

楓香脂又名白膠香味辛苦氣平無毒氣薄味厚陽中之陰也

入足厥陰經

蘇氏曰楓樹西南方及閩陝甚多樹高大枝幹修聳其者連抱數圍其木甚堅有赤有白葉圓而作岐有三角三月開花白色乃連着實大如鴨卵有柔刺八九月熟時曝乾其取脂為楓香脂五月所為坎烈日灼之流聚而成十一月采又解字云楓木葉厚枝高善搖漢官殿中多植之至霜後葉紅可愛故稱楓宸又臨川記云嶺南楓樹歲久生脂遇雷雨漸長至三五尺謂之極人雕刻鬼神可極靈異修治凡川香脂入滾水內煮百沸再入冷水中揉扯數十次曝乾用近世人入不識此誤以松脂明瑩者其謬

○楓香脂摻一切癰毒排膿止痛活血生肌之藥也其性

疏通故木易為虫穴入外科方為癰疽要藥又治吐血

衄血不止又治齒腫齒痛齒脹不消究其味苦能涼血

熱辛平能完毒瘡粘膩能去風燥為散為膏為丸外敷

內服隨證制宜可也。

○集方治一切惡毒潰瘍并破爛不收諸瘡先以米泔溫

水洗淨用楓香脂真鉛粉各等分爲細末摻之○治便

癰膿血不乾用楓香脂一兩配輕粉二錢麝香一分共

研細末摻之○治瘰癧軟癰用楓香脂一兩溶化以蓖

麻子肉六十四粒研入待成膏攤貼○治諸瘡不合口

用楓香脂真輕粉各二錢用猪脂和塗○治金瘡斷筋

用楓香脂爲末敷之○治吐血衄血不止用楓香脂蛤

粉各等分爲細末共和勻每服一錢柿餅煎湯調下○

治齒痛或腫痛或脹或蛀年久不愈用楓香脂六錢香
爐內細灰四錢共研細末每早晚以指頭蘸藥揩擦○
治大風癩瘡用楓香木皮燒存性和輕粉各等分爲細
末麻油調搽効○治水瀉水痢用楓香木皮煎飲立止

熏陸乳香味辛苦氣溫無毒氣厚味薄陽也入足太陰手

少陰兼入足厥陰經

陳示氏曰熏陸香西出天然國色黃白南出波斯國色紫赤生沙磧中樹類古松葉似棠梨盛夏脂溢皮外併皮甲剝取為熏陸脂流之處垂滴成乳頭者為乳香所鑿脂溢成塊者為陳香流溢自上而下用篩接取者為餅香淋瀝根底雜砂石者為砂樹色黑者為土樹受水沙色敗氣變者為水濕樹所削雜屑者為雜末播揚如塵者為粉纏末總是熏陸一種分析也得原采垂滴乳頭圓明潤澤者為貴如脂溢重疊紫紫然不成乳頭者亦即棟香也修治用酒浸研如泥如作末用糯米數粒或燈心草數莖或人情甲二三片共研之即細如粉

○乳香活血去風舒筋止痛之藥也陳氏發明云香烈走

竄故入瀉科方用極多又跌撲鬪打折傷筋骨又產後

血氣攻刺心腹疼痛恒用此咸取其香辛走散散血排

膿通氣化滯為專功也故癰瘍可理折傷可續產後瘀

血留滯可行癥塊痞積伏血冷瘕可去矣。但性燥氣烈去風活血。追毒定痛。除癰瘍產後及折傷筋骨之外。皆不須用。

劉默齋集要方云。內托護心散。以乳香徹瘡孔中。能使毒氣外出。不內攻也。又凡病筋不伸者。敷藥嘗加乳香。極能伸筋。又婦人難產。服湯丸散中。嘗用乳香。使胎滑易生。又治諸經卒痛及心腹久疼。用乳香酒煎服。立時安定。又與諸香同用。能驅邪辟惡。與歸芎同用。能調血催生。並羌獨秦防散。風濕于血滯。並芎朮芷草排膿潰以生肌。凡屬血風寒濕痺痛諸疾。不可缺此。

○集方治跌撲或鬪打折傷筋骨。用真乳香。真沒藥。各一

錢五分。當歸尾、紅花、桃仁各三錢。水煎服。○治跌打潰爛疼痛。用乳香三錢。麻油熬化。冷凝。早晚搽瘡上。○治難產。催生。用乳香、沒藥各三錢。俱瓦上焙出油。冬葵子三錢。共為末。白湯調服。即產。○治產後瘀滯不清。攻刺心腹作痛。用乳香、沒藥俱瓦上焙出油。各三錢。五靈脂、延胡索、牡丹皮、桂枝各五錢。俱炒黃。黑豆一兩。炒成烟炭。共為末。每服三錢。生薑泡湯調下。○治癰疽腫毒。未成可消。已成排膿定痛。用乳香、沒藥、白芷、連翹、赤芍藥、當歸尾、皂角刺俱炒。穿山甲、火燒焦各一錢。二錢。金銀花二錢。酒水各一碗。煎八分服。○治一切癥塊痞積。伏血冷瘕。用乳香、沒藥俱瓦上焙出油。各五錢。草烏一錢。

酒洗炒黃三稜莪朮各一兩酒炒於白木一兩五錢炒

共為末阿魏五錢酒頓化和為細丸如黍米大每早服

二錢酒下。○治心胃痛用乳香沒藥各一兩俱瓦上焙

出油拌水研為細末玄胡索木香白牽牛各五錢俱焙

燥共為細末與乳沒和勻每服二錢白湯調下。○治中

風口眼喎斜用乳香燒烟熏之以順其血脉。○治小兒

急慢驚風用乳香瓦上焙出油甘遂微炒各五錢共為

極細末每用五分薄荷湯調服。○治小兒內釣腹痛用

乳香沒藥俱瓦上焙出油木香各八分為細末用五分

白湯調服。○治風齒牙痛用乳香安孔中燒銀簪頭烙

藥各五錢瓦上焙出油牡蠣燒炭三錢共為末黃蠟五錢香油五錢共熬勻和丸如黍米大每服一錢白湯下

沒藥味苦辛氣溫無毒氣薄味厚陰也降也入足厥陰經

馬氏曰沒藥生波斯國蘇氏曰今海南諸國及廣州亦有之其木之根株似橄欖葉青茂密歲久者則有脂液流淌下地凝結成塊色黑微香狀似安息或大或小斷碎光瑩可愛采無時○或云采時掘樹下為坎用斧伐其皮脂流于坎一月方取如入藥修治藥同乳香

○沒藥破血行瘀化積聚止腹痛之藥也凡金刃木石或

跌撲鬪打墮壓等傷瘀血內冰筋骨疼痛前宜研細熱

酒調服數錢能推陳致新活死血和鮮血也如產後惡

血宿垢不行變態諸患咸宜服之此藥大槩其功長于

通滯血血滯則氣亦壅血滯氣壅則經絡滿急經絡滿

急故發腫作痛也如金刃傷木石傷鬪打墮壓傷產後

血結傷癰瘍腫痛傷咸需之耳然乳香行血活血沒藥

行血散血皆能止痛消腫。故二藥每相兼用。

繆仲醇先生曰。沒藥善通壅滯之血。治一切傷損。腹中血結作痛。要藥而不主諸虛也。凡骨節間與夫胸腹脇肋背加腰脊之痛。非屬瘀血停留。而因于血虛者。胎前血虛。血熱。腹中痛者。產後惡露去多。腹中虛痛者。癰疽潰久。膿水清稀者。皆不宜用。

○集方主治諸證與乳香同

騏驎竭。未鹹甘。氣平。無毒。氣薄。味厚。陰也。降也。入足厥陰。

手少陰經。

蘇氏曰。騏驎竭。生西胡。大食諸國。今廣州亦有之。樹名。渴留。高數丈。似沒藥樹。婆娑可愛。葉似櫻桃。葉有三角。色黃赤。樹中有脂液。流出如膠。餽狀。久而堅。凝成塊。色赤如血者。故名。以火燒之。赤汁湧出。成灰不變。本色者為真。一說。葉斷而有鏡面。光彩能映人影。或取磨指甲。弦間。紅透甲者。方妙。外有一種海母血。真相似。只是味鹹。氣腥。騏驎竭。味鹹。微甘。臭似梔子。氣為別也。雷氏曰。修治。另研作粉。篩過。入丸散中。若同眾藥。搗則化作塵飛散也。

○騏驎竭。活血。瘀散血。聚破血。結行血。死之藥也。凡跌撲

鬪打。及墮壓損傷。傷之輕者。曰血瘀。曰血聚。傷之重者。

曰血結。曰血死。皆血脉留滯于腹中。及經絡骨節之處。

與肌肉俱腐敗者。非活血行血之藥。不能治。然欲保其

生全。含乳沒。騏驎竭之類。誰能起其危困乎。倘有斷骨損筋。或傷及藏府。血瘀血脹。垂死者。此三種之外。更加山羊血。或猴經。二三釐酒調灌之。下咽。卽有生理。眞活命之良方也。又療癰疽惡毒。引膿生肌。

前賢劉河間曰。血竭除血痛。爲和血之聖藥。乳香沒藥。雖主血病。而兼入氣分。此藥專于血分者也。

○集方治一切打撲損傷。用騏驎竭。乳香。沒藥。二味瓦上焙出油。自然銅。火煨酒淬。狗頭骨。火煨。酒淬。麻皮。灰。黃荆子。骨碎。補各等分。俱酒炒。共爲末。每服三錢。白湯下。○治產後血暈。不知人事。及在言者。用騏驎竭一兩。研末。煎服二錢。溫酒下。○治產後血衝心膈。喘滿。命在須臾。用騏驎竭。沒藥。各一錢五分。研細末。煎便和酒調服。○治一切金瘡。及腫毒潰爛。不生肌肉。用騏驎竭。淨髮。灰。乳香。沒藥。輕粉。象牙末。各等分。冰片。些少。共爲末。搽之。○治金瘡。山血不止。用騏驎竭爲末。敷之。○右五方。

安息香。味辛苦。氣平。無毒。氣厚。味薄。陽也。入手少陰經。

蘇氏曰。安息香。生西域。及南海波斯國。今安南。三佛。諸番亦有之。樹如苦楝。長二。三丈。大而且直。皮色黃黑。葉似羊桃。而長。有四角。經寒不凋。三月開花。黃色。花心微碧。不結實。刻其木皮。其脂如餡。又如松脂。黃黑色。能發衆香。故人取以和香。絕佳。然不宜于燒也。

○安息香。通心竅。辟鬼邪。除中惡。子神魔寐之藥也。大氏方祛

一切神鬼。魍魎。妖魅。精邪。及人身寒濕冷氣。霍亂陰病。

又治婦人產後血暈。血脹。口噤異疾。并老人氣閉。痰厥。

失音等疾。蓋此藥入手少陰心經。心藏神。病由氣閉。痰厥。

厥則神昏矣。神昏則邪惡鬼氣。易于侵犯。藉此芳香清。

烈之氣。通神明。而開心竅。辟諸邪。則前證自除也。但辛。

香行散之品。亦能走散真氣。如中氣不足。陽神自虛。非。

關惡氣鬼邪侵犯者宜斟酌用。

○集方治鬼疰尸疰寐魘暴亡及大人小兒卒中惡氣。

一切神鬼精邪侵犯者用安息香一錢鬼臼二錢犀角八

分牛黃五分丹砂乳香雄黃各一錢二分俱研極細末

石菖蒲生薑各一錢泡湯調服五分○治寒濕冷氣中

霍亂陰證者用安息香一錢為末人參製附子各二錢

煎湯調服○治婦人產後血暈血脹口噤垂死者用安

息香一錢五靈脂水飛淨末五錢共和勻每服一錢炒

薑湯調下○治老人氣閉痰厥失音垂死用蘇合香丸

薑湯調服立甦此方推安息香為首用也。

蘇合香味甘氣溫無毒

蘇氏曰蘇合香出西域及崑崙紫赤色與紫樹相似堅實體重如石極芳香燒之灰白者佳又一說云廣州亦有蘇合香但類蘇木無香氣煎汁如膏油者極芳烈而香色黑狀如獅子矢也又梁書云中天竺國出蘇合香是諸香汁煎成非自然一物也又一說云蘇合香出安南三佛齊諸番國樹生膏脂以濃而無滓者為佳又一說云蘇合香多葉子如金色按之即沒放之即起良久不定如蟲動氣烈者佳又一說此香出蘇合國因以名之然諸說聚訟不一朱不敢孰是孰非俱采集以俟後之博物君子鑒定云

○蘇合香通五藏六府一切氣竅去風行痰除癰定悸鎮

驚安神之藥也香烈氣竄能溫散留滯故局方主辟惡

鬼精邪蠱毒瘴氣中風中寒及溫瘧寒熱夢魘魂迷尸

蟲尸疰奔心腹卒痛吐利時氣一切暴疾或牙關緊急

人事不清服此使閉悶者疎通昏亂者省覺故命名曰

蘇合云。

○集方治五藏下六府方氣竅和不通陽用蘇合香一錢石菖蒲焙

三錢薑製半夏焙二錢共為末以蘇合香酒溶化為丸

如龍眼核大每服一二丸淡薑湯化下。○治五種癩證

用蘇合香一錢五分薑製半夏焙膽製南星焙天竺黃

各三錢共為末以蘇合香酒和化為丸龍眼核大每早

晚各食前服二錢淡薑湯下。○治驚悸神志不寧用蘇

合香一錢二分羚羊角犀角俱鎊末各三錢茯神天竺

黃膽星俱微炒各五錢共為末以蘇合香酒溶化為丸

龍眼核大每早晚各服一九燈心湯化下。○治惡鬼精

邪作祟用蘇合香于臥牀前煨之或用分許薑湯調服

○治溫瘧寒熱從山林草野瘴癘之間。或從囹圄瘟瘴之氣而成者。用蘇合香一錢。紫蘇葉五錢。川芎三錢。廣陳皮二錢。共爲末。每服五分。淡薑湯調下。○治心膽之氣虛乏。多患夢魘魂迷之證。用蘇合香二分。人參五分。生薑一錢。每臨臥時。泡湯飲之。○治尸蟲傳染。并尸疰異疾。用蘇合香。安息香。乳香。沉香。各五分。泡湯一碗。空腹飲之。此藥可泡十餘次。以藥盡爲度。○治心腹卒痛。吐利時氣。用蘇合香五分。藿香梗一錢。五靈脂二錢。共爲末。每服五分。生薑泡湯調下。

倪朱謨曰肩方諸風痰藥中往往用此以祛風行痰順
氣活血於卒中痰風鬱閉不通者極靈

龍腦香味辛苦氣寒性熱無毒陽中之陽升也散也。

李氏曰龍腦香俗呼為冰片又名梅花腦因其白瑩如冰及梅花片狀故名山姿律林羅短叱諸國今南海深

山窮谷亦有之其液為膏其脂為香蘇氏曰其樹高六七丈大四五圍形如老杉木狀其臭亦如杉木氣旁生

勁枝葉圓而青背白作花結實如荳蔻仁皮有甲錯葉氏曰其木肥者根下有清液為姿律膏剛其樹液流根

下截其上液溢木端其枝枯未經損動則行否則氣洩無之矣無花實者其木瘦瘦者生香為龍腦香多歷年

歲者風清月朗時噴香氣明若霏雲縹緲木上先其時布帛經樹底驚之令墮形如蜂蝶翅此屬上品頃則仍

吸香入木理不易得也又蘇氏曰斷其樹濕時無香乾之循理而折狀如雲母瑩若冰雪或解木作板香溢縫

間劈而取之大者成片如花解小者成粒為米腦為瑞腦為金剛腦為蒼龍腦因其形色為名總不及如蜂蝶

成片者氣全力精也濕者為腦油清者為腦漿異聞錄云南唐保大中貢龍腦漿貯之縑囊懸琉璃碗內少頃

漸凝成水香氣清烈為世所珍也盧氏曰近時多用火福成片更以樟腦昇打偽造不可不辨收貯燒杉木炭

合養之或糯米炭共貯之則不耗修治入舊瓷鉢轉展徐研務令塵細急展則耗鉢生熱便隨香竄耗欲藉透

肌走竅用平底小鏡以青布剪如底式一面噴潤淨水
 粘貼鏡底置龍腦于布上覆以盤盤沿外餘布數分
 攪麥麩因滴盤布周沿辨使氣洩隔鏡底寸許燃燒
 火候麥麩色焦界覺焦黃即便住火候冷開視火法合
 宜龍腦盡昇盤上輕盈潔白香穠百倍于昔○李氏曰
 又按宋史熙寧九年艾州雷震深山中一梓樹木盡枯
 中皆化為龍腦香此雖屬怪異
 可見龍腦亦有變化而成者也

○龍腦香開竅辟邪之藥也性善走竅啟發壅閉開達諸

竅無往不通然芳香之氣能辟一切邪惡辛烈之性能

散一切風熱故唐本草主暴赤時眼腫痛羞明或喉痺

癰脹水漿不通或腦風頭痛鼻瘖鼻淵或外痔腫痛血

水淋漓或交骨不分胎產難下或風毒入骨麻痛拘攣

或痘毒內閉煩悶不出此藥辛香芳烈善散善通為効

極捷一切卒暴氣閉痰結神昏之病非此不能治也然

非常服之藥。如大人小兒風涎閉塞及暴得驚熱者可用。如久病元虛而成中風風痺之證。吐瀉後成慢驚者不可用也。眼目係暴熱成翳障者可用。如肝腎精血不足成昏暗者不可用也。風痛在骨髓者可用。在血脉肌肉者不可用也。世但知其涼而通利未達其熱而輕浮飛越喜其香而貴重。動輒與麝香同為桂附之助。然人身之陽易動。陰易虧。不可不慎也。

潘壽軒先生曰。一女子年十歲。病發熱。腰痛。手足厥逆。語言譫妄。神氣昏迷。形證極惡。一醫云。陽毒傷寒。一醫云。陰證傷寒。予診其脈。沉緊而數。詢其家人云。尚未出痘。予疑是痘候。時暑月急。取屠家猪心血半盞。用冰片

二分研細和服得睡須臾。一身痘出而安。若非此方則橫天矣。又昔廖瑩中以熱酒服一握九竅流血而死此非冰片有毒乃熱酒引其辛香散溢經絡氣血沸亂而然爾。

○集方治暴赤時眼用冰片五分。硼砂一錢薄荷二錢共為極細末頻噴兩鼻。○治喉疔癰脹用冰片二分燈心三錢黃柏二錢二味燒存性白礬七分煨共為極細末每以一二分吹患處絕妙。○治頭風頭痛用冰片五分天南星五錢共為極細末薑汁調敷痛處。○治鼻生瘰肉垂出脹塞不通用冰片一味點之自消。病頭風腦漏之人多患此。○治外痔脹疼用冰片三分嫩滑石三錢。

共爲極細末。不時搽之。○治產難催生。用冰片三釐。溫湯調服。立產。○治風毒入骨。將成廢人。用冰片一錢。大南星。生半夏。各五錢。鳳仙花子三錢。共研極細末。葱汁調塗痛處。如乾落。再以葱汁調濕塗之。○治痘毒內閉。不出。狂躁心煩。氣喘妄語。或見鬼神。瘡色赤。未透者。用冰片一錢。細研。旋以猪心血。九芡實子大。每服一九。紫草煎湯調下。少頃心神便定。得睡發瘡。○治中風牙噤。無門下藥。用冰片三分。天南星二錢。共爲極細末。每以三分。揩齒三三十遍。其口自開。○治下疳臭爛。用冰片五分。嫩蘆甘石四錢。共研極細末。不時搽之。○求死不得。用冰片二錢。熱湯吞下。氣散立殞。

○太醫藥方抄論痢疾太后患痢疾腫痛赤瘰晝夜不寐不肯服藥不肯點藥一醫奏取大冰片一兩鋪盤內請太后細細觀之以頃腫痛潛消赤瘰頓退蓋取冰片之氣逼眼清香涼而散之故曰之腫痛赤瘰自退矣亦巧法也

一萬病回春
牛黃膏治婦人熱入血室發狂不認人者用冰片二分牛黃三分甘草一錢硃砂薑黃牡丹皮各三錢共爲極細末煉蜜丸如皂角大每服一丸燈心湯化下此方兼可治男婦癲狂風癩諸證

紫鈿味甘鹹氣平有小毒

按酉陽雜俎云紫鈿樹出真臘國及波斯國土人呼為渴稟又名勒佳樹高一丈枝葉繁盛宛如橘柚木與滋液俱赤色經冬不凋四月開花白色不結實天有霧露及雨花濡潤則枝條出鈿狀如糖霜纍纍紫赤破則鮮紅用造種赦作宮女而飾與麒麟蜀相類實非一種也

○紫鈿起痘行漿之藥也唐本草治痘不作漿或皮薄欲損血溢于外者用之取其象形以從治也

王紹隆先生曰男女媾精姪欲之毒遂含胞胎伏藏兩腎有生之後發為痘瘡始發也如春氣之升行漿也如夏氣之出回合也如秋氣之降剝落也如冬氣之入舉世但知始發之欲透未知毒化之成漿稱為切要何也如去滓純水必清必靜全賴此耳否則仍含毒種復歸

兩腎。生死存亡。變生不測矣。紫鈔固為解毒之要品。但可施于化毒之際。不可施于始發之期。更有毒未化而漿不行。反棄鈔液之橫偏。預投保元之降藏。雖不顧姪毒之不攘。獨不念六淫之未散乎。司業者當留心而熟思之可也。

○集方治痘瘡皮破漿水泛出。或手搔傷損。用紫鈔研極細末。敷之即乾。并不走洩元氣。○治痘瘡漿不豐滿。或乾枯。或水塌不透者。用紫鈔一二分。為細末。糯米湯調灌。或人參湯調。或純酒漿調。亦可。

樟腦 味辛 氣熱 無毒

李氏曰樟腦出漳州詔州狀如龍腦白色如粉潤乃樟樹脂膏也。又胡氏鍊樟腦方云用樟木新鮮者切片以井水浸三日入鍋煎之柳木頻攪待汁減半柳木上有白霜起即濾去滓傾汁入瓦盆內經宿自然結成塊也他處雖有樟木不能取腦又陳氏方昇鍊樟腦法用銅盆一口以陳壁土為極細末糝盆底馬糝樟腦一重又糝壁土一重如此四五重以薄荷葉放土面上而用銅盆一口覆之用細黃土鹽滿插水和如膏封固勿令走氣于文火上款款炙之須以意度不可太過不可不及候冷取出則駢皆昇于上盆如此昇兩三次潔白如雪可偽充片腦也

○樟腦通竅殺蟲除疥癬禿瘡之藥也李氏方云此藥辛

熱香竄稟龍火之氣去濕殺蟲此其所長故燒烟熏衣

滅虱逐蚤熏房室并牀帳枕簟善辟臭蟲及一切蟻蜂

蠅螫等類又集要方治脚氣止牙疼總之去濕殺蟲盡

在是矣。止堪敷塗，不堪服食。故外科方每需用耳。

○集方治一切瘡癢蟲疥及一切頑癬。有蟲者用樟腦一

兩。大楓子肉二兩，搗膏。大黃、硫黃、胡椒各五錢，三味俱

微炒，為細末，和入大楓膏內，再入樟腦同搗勻。再入水

銀五錢，再研勻，再搗三百下，為丸。彈子大，每臥時被

內以藥周身摸之，不過二三次，愈。如治頑癬，本方再加

斑猫末五分，信石末一分，如藥乾燥，諒加香油些須，亦

可。○治小兒禿瘡，用樟腦三錢，花椒末、瀝青末各二錢，

生芝麻一兩，先以退猪湯洗淨，患上以香油少許調搽。

○治蟲牙疔痛，用樟腦、黃丹各一錢，胡椒五分，共研細
煉蜜丸。如黍米大，塞患孔中。○治脚氣腫痛，用樟腦三
錢，草烏頭二錢，烏極細末，糯米九，彈子大，每置一丸于
足心，踏之下。微火烘之，衣被圍覆，汗出如涎，即效。

阿魏味辛氣平無毒

蘇氏曰阿魏生西番及崑崙國苗葉根莖酷似白芷搗根汁煎成爲上截根膠乾爲次稽氏又言阿魏生崑崙國是木津液如桃膠狀其色黃者爲上色黑者次之陳氏又言阿魏雲南長河中亦有今廣州亦有是木膏液銛之汁出漸滴凝結與蘇氏所說不同又西陽雜俎云阿魏出波斯國及北天竺其樹長八九尺其色青黃三月生葉似鼠耳無花實其枝汁出如木久乃堅凝又言取其汁和米豆粉合煖而成諸說雖不同而氣體極臭而又能止臭亦爲奇物也戎人則嘗啖謂能止臭猶阿魏廣嗜攬擷中州貴胡收巴人重負背也又元紀云阿魏元人用充食料根名德展又名薰渠用滄牛羊肉轉更香美盛暑赤不色變○李贛湖曰阿魏有草木二種草者出西域可煎可曬蘇氏所說是也木者出南番取其脂汁凝結稽氏陳氏所說是也又按一統志所載有此二種云出火州及沙鹿海牙諸國草高尺許根株獨立枝葉如蓋臭氣逼人生取其汁熬膏名阿魏又言出三佛齊及暹羅國樹不甚高上人納竹筒于樹內脂滿其中冬月被筒取之又云其樹最高其脂最毒其氣逼人最臭不取近每采時以羊繫于樹下自遠射之脂液着羊羊斃卽爲阿魏觀此則其有二種明矣然繫羊射脂

之說俗語相傳但無實據修治以熱酒溶化和入藥用

俗云阿魏無真言多偽也今市家搗蒜肉雜以他物偽

如不可不辨雷氏曰驗阿魏真假有三法一法以半銖

安煎銅器中只畫夜着處色白如銀永不變色二法以

井外道五科草自然汁內次早盡變鮮紅色三法以

一銖置桶上其樹立乾驗此三法真偽判然矣

○阿魏化積墮胎殺蟲療蠱之藥也其氣辛烈而臭元人

入食料中能辟一切禽獸魚鼈腥葷諸毒凡水菓蔬菜

米麥穀豆之類停留成積者服此立消故汪氏方治瘰

癧瘰癧霍亂瘰痢尸蟲痞結等候咸取其氣息極辛極

臭之物以除此不正之氣以致疾耳氣味雖有穢惡然

不大損胃氣故方脈科每需用而不棄也

繆仲醇先生曰按入血氣聞香則順聞臭則逆雖有病

積不可輕用當先養胃氣胃強則堅積漸消矣書曰大

積大聚其可犯也衰其半而止蓋兢兢于根本者乎。

○集方治一切痞塊癥瘕食飲血氣成積者用阿魏五錢

白芥子四兩白朮三兩三稜莪木各二兩四味俱炒燥

研爲細末以阿魏熱酒溶化和入爲丸黍米大每早晚

各服二錢白湯下婦人病此本方加當歸川芎乾漆俱

酒炒各一兩○又貼痞膏用阿魏乳香沒藥芒硝各二

兩俱研細聽用外用大黃二兩白芥子三兩木鼈子二

十一箇去殼穿山甲肉桂川獨活各一兩五錢亂髮二

兩用香油四十兩煎黑去渣待油冷凝入鍋內乘油冷

時加水飛淨細炒燥黃丹二十兩將油煎滾用鐵箸不

住手攪以黃丹黑熟軟硬得所提起將凝加入阿魏乳

沒硝四味細末在內攪勻卽成膏矣。凡貼膏藥時先用
芒硝研細隨患處鋪半指厚以紙蓋定用熱熨斗熨良
久如硝耗再加熨之。二時許方貼膏藥。○治尸疰中惡
近死尸惡氣入腹終年嘗發者用阿魏二分。侵晨熱酒
吞下。并治瘟疫瘡癘霍亂痧瘧諸病。○治小兒治盤腸內
疝腹痛不止用真阿魏一錢爲末大蒜一榔煨熟研爛
和丸如麻子大每服五丸艾湯化下。○治脾積結塊用
阿魏五分雞子五箇去殼湯內同阿魏煮以湯乾雞子
黃白俱老入石臼內同搗勻細黃蠟一兩溶化入阿魏
雞子膏同熬數十沸入香油五六茶匙攪勻再入石臼
內搗百下爲丸如黍米大每服一錢白湯下。

盧會，味苦，氣寒，無沉也，降也。入心、肝、脾、三經。

李氏曰：盧會，出波斯國及瓜哇三佛齊諸國。今廣州亦有之。生深山中，乃樹脂滴凝而成。狀如黑錫。又一說云：狀似燕尾，乃草屬也。采取無時。蘇氏曰：盧會原在草部，今移入木部。二說不同，何哉？豈是木質而草形，抑木形而草質者乎？

○盧會，涼肝殺蟲之藥也。宋開寶方主除心肺熱煩，去胸

膈鬱火，大人痔瘻濕癬，小兒疳積蟲疳，癩癩驚痰諸疾，

又去三蟲，消五臟。凡屬肝臟為病，有熱者用之，必無疑

也。但味極苦，氣極寒，諸苦寒藥無出其右者。其功力主

消不主補。以上數證，因內熱氣強者可用。如內虛泄瀉

食少者，禁之。

李觀湖先生曰：盧會乃厥陰經藥，其功專于殺蟲清熱。

故治熱疔成積有效

盧不遠先生曰盧會傳說有草木二種或國異形別亦

有之味極苦氣極寒對治以熱為因為疔為癰為熱聚

所生之蟲病莫不精良

○集方治痔瘻眼痛血水淋漓用盧會數分白酒磨化和水

或在手足或在腰腹用盧會五錢甘草二錢共研末先

以溫米泔水洗癢拭搽敷之立乾便瘻○治小兒疔積

蟲積用盧會三錢使君子肉一兩共研末每服三分白

湯調下○治大人小兒五種癰癩用盧會三錢生半夏

一兩切碎薑汁拌炒白木一兩酒炒甘草五錢炒共為

細末水發為丸如黍米大每服一錢五分薑湯送下○

治小兒急驚風用盧會麝星天竺黃雄黃各一錢共為

末甘草湯和丸如彈子大每遇此證用將心湯化服

九○治痢結心痛用盧會一錢剪碎如米粒大用烏梅

花椒湯吞服○治五種癰腫用盧會嚼碎各三錢酒

盪浸一日蒸化如膏以生半夏為末二兩巴霜三分和

丸如黍米大每服十九淡薑湯早晚吞下忌鹽糖百日

孩兒茶味苦澹氣平無毒

李氏曰孩兒茶出南番瓜哇暹羅諸國今雲南老撾
雲場地方造之云是細茶末入竹筒中堅塞兩頭埋
泥溝中日久取出搗汁熬製而成其塊
小而潤澤者為上塊大而焦枯者次之

○孩兒茶解山嵐瘴熱歛瘡生肌之藥也張相如曰服食
方鮮有用者惟入外科收歛瘡口摻藥中用此能定痛
止血收濕生肌又兒科牙疳方中配川黃連共為細末
搽牙根處亦能歛潰收濕定痛生肌出李氏綱目今吳門市
中售香茶以孩兒茶為主食之果香甜涼癸移時藥味
已過轉增燥渴次蚤更覺口乾苦澹較前倍常則前人
所云解渴生津未可深信